

Bil. 42

Selasa

4 Disember 2018



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

PARLIMEN KEEMPAT BELAS
PENGKAL PERTAMA
MESYUARAT KEDUA

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Kementerian Dalam Negeri Harus Menyiasat dan
Mengambil Tindakan Keras Terhadap Kes Penipuan
“Macau Scam”**
- YB. Tuan Charles Anthony Santiago (*Klang*) [Halaman 1]
- **Perkhidmatan Kakitangan Jabatan Latihan Khidmat
Negara**
- YB. Tuan Haji Akmal Nasrullah bin Mohd Nasir (*Johor Bahru*) [Halaman 4]

**MALAYSIA
KAMAR KHAS
PARLIMEN KEEMPAT BELAS
PENGAL PERTAMA
MESYUARAT KEDUA**

Selasa, 04 Disember 2018

Mesyuarat dimulakan pada pukul 2.30 petang

DOA

*[Timbalan Yang di-Pertua (Tuan Nga Kor Ming)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Kementerian Dalam Negeri Harus Menyiasat dan
Mengambil Tindakan Keras Terhadap Kes Penipuan "Macau Scam"**

2.34 ptg.

Tuan Charles Anthony Santiago [Klang]: Tuan Yang di-Pertua, ini adalah untuk memberi notis di bawah Peraturan Mesyuarat 14(1)(h) dan 17(1) untuk mengusulkan perkara kepentingan kepada orang ramai yang berkehendak disegerakan seperti berikut:

"Bahawa Dewan mengizinkan Charles Santiago, Ahli Parlimen Klang untuk menangguhkan Dewan mengikut Peraturan Mesyuarat 14(1) untuk mengusulkan perkara kepentingan kepada orang ramai yang berkehendak disegerakan dalam Kamar Khas iaitu "Kementerian Dalam Negeri Harus Menyiasat dan Mengambil Tindakan Keras Terhadap Kes Penipuan 'Macau Scam'.

Saya telah menerima beberapa aduan daripada rakyat Klang bahawa mereka ditipu oleh sindiket siber untuk memindahkan simpanan kewangan mereka kepada akaun-akaun tertentu. Salah seorang pengadu, Puan Koh Lay See (Nombor kad pengenalan: 780317-10-5450) telah menerima beberapa panggilan telefon daripada sindiket penipuan. Mereka menyamar sebagai pegawai bank Hong Leong dan pegawai polis yang menyiasat kes tersebut.

Polis palsu itu memberi amaran kepada Puan Koh, polis sedang menyiasat akaun banknya di bawah undang-undang pengubahan wang haram (*anti-money laundering*), jika beliau tidak memindahkan simpanan kewangan tersebut, beliau akan ditangkap oleh pihak

polis. Akhirnya, Puan Koh terpaksa memindahkan simpanan wang sebanyak RM648,000 kepada empat akaun bank atas arahan polis palsu tersebut (Nombor *report*: KLANG/025705/18 & PANDAMARAN/006910/18).

Saya mengambil maklum bahawa pihak Polis Diraja Malaysia (PDRM) merupakan badan kerajaan yang bertanggungjawab untuk menjalankan siasatan terhadap kes-kes penipuan kewangan ini dan telah mengenal pasti sindiket tersebut sebagai "*Macau Scam*".

Oleh sebab, Puan Koh telah memberikan segala maklumat termasuk nama dan nombor keempat-empat akaun bank, kad pengenalan dan alamat pemilik akaun, PDRM boleh bekerjasama dengan Kementerian Komunikasi dan Multimedia, Bank Negara Malaysia, bank- bank yang terlibat untuk menyiasat dan mengambil tindakan keras terhadap sindiket penjenayah tersebut.

Dengan ini, saya meminta Kementerian Dalam Negeri menerangkan status siasatan kes penipuan "*Macau Scam*", beberapa tangkapan sudah dibuat dan kemungkinan mangsa-mangsa untuk mendapat balik simpanan kewangan mereka. Sekian, terima kasih.

2.35 ptg.

Timbalan Menteri Dalam Negeri [Dato' Mohd Azis bin Jamman]: Terima kasih Tuan Yang di-Pertua, terima kasih Yang Berhormat Klang. Kementerian memandang serius kes-kes penipuan yang berlaku di dalam negara termasuk kes penipuan telekomunikasi atau dikenali sebagai "*Macau Scam*" yang menyebabkan kerugian yang besar kepada mangsa.

Dari tahun 2016 sehingga September 2018, sejumlah 9,936 kes penipuan "*Macau Scam*" telah dilaporkan dengan nilai kerugian menghampiri RM317 juta. "Modus operandi" yang sering digunakan oleh sindiket adalah dengan menakutkan mangsa kononnya beliau mempunyai hutang tertunggak atau kad kredit mangsa telah digunakan oleh pihak lain, terlibat aktiviti pengubahan wang haram, terlibat dalam pengedaran dadah, mempunyai saman dari mahkamah dan sebagainya. Mangsa kemudiannya akan diperdaya untuk memindahkan wang ke dalam akaun pihak ketiga dengan alasan untuk mengelakkan akaunnya dibekukan oleh Bank Negara sementara menunggu siasatan kes tersebut dijalankan.

Berhubung kes yang melibatkan penama Puan Koh Lay See (Nombor kad pengenalan:780317-10-5450), pihak polis menerima laporan bersangkut Klang Repot: 25705/2018, bertarikh 17 Ogos 2018 dan Pandamaran Repot: 6950/18 bertarikh 23/08/2018. Dalam kes ini, pengadu mendakwa bahawa telah dihubungi oleh individu mengaku dari Hong Leong Bank Kuala Terengganu dan juga pihak polis dari Ibu Pejabat Polis Kontinjen

Terengganu mendakwa pengadu mempunyai hutang di bank, terlibat dengan jenayah dadah dan aktiviti penggubahan wang haram.

Pengadu kemudian telah diarahkan untuk membuat pindahan wang bagi tujuan siasatan lanjut pihak polis dan telah memindahkan sejumlah RM642,546.36 ke beberapa akaun bank yang diarahkan. Siasatan terhadap kes ini telah dijalankan di bawah seksyen 420 Kanun Keseksaan dan pihak polis telah berjaya menangkap dua orang suspek pemilik akaun dan suspek telah dituduh di bawah seksyen 424 Kanun Keseksaan dan masih dalam peringkat perbicaraan. Usaha juga telah diteruskan untuk mengesan lain-lain suspek yang terlibat dalam kes ini.

Kementerian menyedari tentang masalah kes penipuan secara “*Macau Scam*” dan sentiasa berusaha keras mengatasi kemelut yang melanda ini dengan mengambil beberapa pendekatan dan inisiatif seperti berikut:

- (i) Jabatan Siasatan Jenayah Komersil, Polis Diraja Malaysia (PDRM) juga telah melancarkan portal semakan *mule account* secara atas talian melalui laman web ccid.rmp.gov.my/semakmule/. Melalui portal ini orang awam boleh membuat semakan terhadap mana-mana akaun bank sama ada ianya pernah dilaporkan kepada pihak polis berkaitan kes-kes jenayah komersil. Selain itu, PDRM juga telah mewujudkan satu akaun *Facebook* “*Cyber Crime Alert Royal Malaysia Police*”, dengan izin, bagi berkongsi maklumat berkenaan modus operandi kes-kes jenayah siber/komersil seterusnya memberi peringatan kepada masyarakat berkenaan perkara ini;
- (ii) mengambil tindakan di bawah Akta Pencegahan Penggubahan Wang Haram, Pencegahan Pembiayaan Keganasan dan Hasil Daripada Aktiviti Haram (AMLATFPUAA) 2001. Selain itu, tindakan pencegahan ini turut diambil di bawah Akta Pencegahan Jenayah (POCA);
- (iii) menubuhkan Pasukan Petugas Khas yang terdiri daripada lain-lain agensi penguatkuasaan tempatan dan luar negara, pakar industri serta penyedia perkhidmatan *online* dalam usaha mengekang aktiviti jenayah atas talian memandangkan jenayah ini beroperasi secara merentasi sempadan negara dan menjadi masalah sejagat;
- (iv) pihak kerajaan sedar bahawa sindiket penipuan ini turut melibatkan penggunaan akaun bank milik rakyat tempatan ataupun dikenali juga sebagai keldai akaun ataupun *mule account*, dengan izin, dalam

menjalankan aktiviti penipuan mereka. Oleh yang demikian, tindakan penguatkuasaan juga diambil terhadap pemilik-pemilik akaun ini yang telah memberi pinjam akaun bank mereka kepada penjenayah bagi tujuan memudahkan penjenayah melakukan kegiatan ini. Selain itu ianya juga sebagai amaran kepada pemilik akaun agar tidak sewenang-wenang menyerahkan akaun bank mereka kepada pihak ketiga untuk tujuan jenayah;

- (v) kerjasama bersepadu turut dilakukan di antara penyedia perkhidmatan komunikasi internet di Malaysia seperti Suruhanjaya Komunikasi & Multimedia Malaysia, Telekom, *Times* dan juga kerjasama institusi kewangan dan Bank Negara dalam mengesan dan membuat tangkapan terhadap pemilik Keldai Akaun (*mule account*); dan yang terakhir
- (vi) selain tindakan penguatkuasaan undang-undang yang lebih agresif, pihak kerajaan juga menjalankan kempen-kempen kesedaran kepada masyarakat supaya tidak mudah panik, tidak mudah percaya, sentiasa teliti dan cermat, berfikiran tenang, membuat semakan dan pengesahan sebelum mengambil sesuatu keputusan supaya tidak menjadi mangsa jenayah penipuan.

Dalam kesempatan ini, kementerian mengingatkan orang awam supaya membuat semakan dengan pihak berkuasa terlebih dahulu untuk menentukan kesahihan sebarang dakwaan yang diterima dan jangan mudah mempercayainya. Pihak berkuasa seperti PDRM dan juga pihak berkuasa yang lain tidak pernah mengarahkan orang awam membuat sebarang transaksi kewangan kepada pihak tertentu atas apa alasan sekalipun. Semua proses pembekuan, pelucutan dan rampasan yang dibuat oleh pihak berkuasa adalah mengikut proses undang-undang. Sekian, terima kasih.

■1440

Perkhidmatan Kakitangan Jabatan Latihan Khidmat Negara

2.41 ptg.

Tuan Haji Akmal Nasrullah bin Mohd Nasir [Johor Bahru]: Terima kasih Tuan Yang di-Pertua dan Yang Berhormat Menteri. Berikutan penutupan Program Latihan Khidmat Negara (PLKN), kesemua kakitangan Jabatan Latihan Khidmat Negara (JLKN) telah diserap di bawah Kementerian Belia dan Sukan (KBS) bermula 1 Oktober 2018.

Sebahagian daripada mereka ini adalah kakitangan kontrak iaitu seramai 2,139 orang yang akan tamat kontrak pada 31 Disember 2018. Sehingga kini, tiada pemakluman lanjut dan bertulis daripada KBS berkaitan status perkhidmatan kontrak mereka bagi tahun 2019 nanti.

Mereka ini dikatakan layak untuk menerima ganjaran setelah menamatkan tempoh perkhidmatan. Jumlah tuntutan ganjaran dan juga pembayaran wang tunai sebagai gantian cuti rehat (GCR) bagi kakitangan kontrak JLKN ini dianggarkan mencecah jutaan ringgit. Adakah KBS akan bertanggungjawab melunaskan jumlah tuntutan tersebut? Apakah perancangan KBS terhadap mereka dan mohon penjelasan serta pendirian adakah KBS berminat untuk menyambung kontrak 2,139 orang kakitangan kontrak JLKN?

Jika berminat, apakah status proses dokumentasi bagi penyambungan kontrak mereka yang telah diserap masuk ke dalam KBS pada 1 Oktober yang lalu? Adakah KBS mempunyai perancangan untuk menempatkan mereka di Jabatan atau Agensi atau Bahagian ataupun unit lain yang berada di dalam KBS? Jika tiada kekosongan dalam KBS, adakah KBS akan membantu mereka mencari penempatan baru di agensi-agensi kerajaan yang lain?

Bagi menyelesaikan isu ini secepat mungkin, adakah Menteri sendiri akan mengadakan satu perjumpaan bersama wakil JLKN sebelum tamatnya kontrak mereka pada 31 Disember 2018? Kontrak kakitangan-kakitangan tersebut perlu disambung secepat mungkin. Adakah KBS komited untuk menawarkan kontrak baru sebelum 31 Disember? Akhir sekali, adakah KBS akan turut menerima peralatan-peralatan yang digunakan ketika PLKN yang perlu dipindahkan daripada bangunan Kementerian Pertahanan? Sekian, terima kasih.

2.44 ptg.

Menteri Belia dan Sukan [Tuan Syed Saddiq bin Syed Abdul Rahman]: Terima kasih Tuan Yang di-Pertua, terima kasih Yang Berhormat Johor Bahru. Kementerian Belia dan Sukan (KBS) kini sedang merangka program baru bagi menggantikan Program Latihan Khidmat Negara (PLKN) dan Biro Tatanegara (BTN). Program ini dirangka secara holistik dengan menggabungkan aktiviti *indoor* dan *outdoor* berimpak tinggi untuk belia berkepimpinan dan berwawasan berpandukan Perlembagaan Persekutuan.

Merujuk kepada isu kakitangan kontrak di JLKN, setakat 3 Disember 2018, seramai 2,116 orang pegawai lantikan kontrak, di mana kontrak mereka akan berakhir pada 31 Disember 2018. Untuk makluman Yang Berhormat, kementerian pada 20 September 2018

telah menyampaikan pemakluman secara rasmi berhubung status perkhidmatan kontrak pegawai-pegawai ini yang tidak akan dilanjutkan, sambil kita maklumkan ada program *soft landing* iaitu di mana walaupun kerja tidak berjalan, gaji tetap dibayar sampai bulan Disember.

Merujuk kepada persoalan kelayakan ganjaran kepada pegawai-pegawai kontrak ini, Kementerian Belia dan Sukan bertanggungjawab membayar ganjaran tersebut. Kementerian sedang giat memproses urusan pembayaran ganjaran ini dan dijangka diselesaikan pada minggu kedua tahun 2019 dengan syarat dokumen adalah lengkap. Ini kerana KBS telah pun mengambil alih program PLKN hanya apabila tibanya 1 Oktober dan sebelum ini dikendalikan oleh Kementerian Pertahanan. Oleh sebab itu, sekarang kita akan pastikan bahawa ganjaran tersebut akan dilunaskan pada minggu kedua tahun 2019.

Untuk makluman Yang Berhormat, KBS sedang menjalankan program perintis yang mengadaptasi Model *Youth Adventurous Course Outward Bound School* yang menerapkan nilai kepimpinan, jati diri dan kenegaraan bermula November 2018 sehingga Disember 2018 di *Outward Bound School* (OBS) Lumut, Perak.

Sebilangan pegawai-pegawai kontrak JLKN ini telah pun terpilih sebagai tenaga pengajar bagi program ini dan akan disambung kontraknya pada tahun 2019. Jumlah ini bagaimanapun hanya dijangka bertambah seramai 400 orang tenaga pengajar yang diperlukan untuk pelaksanaan program ini pada tahun hadapan. Pegawai-pegawai JLKN yang memenuhi kompetensi dan keperluan akan diberi keutamaan untuk dilantik semula sebagai tenaga pengajar bagi program ini.

Untuk makluman Yang Berhormat, KBS telah mengadakan perjumpaan dengan wakil pegawai kontrak JLKN pada 26 November 2018 bertempat di Menara KBS yang dikepalai Yang Berbahagia Dato' Lokman Hakim Ali, Ketua Setiausaha KBS dan dihadiri oleh Yang Berbahagia Datuk Noridah Abdul Rahim, Pengarah Bahagian Perkhidmatan, Jabatan Perkhidmatan Awam serta wakil dari Kementerian Kewangan Malaysia. Semasa perjumpaan tersebut, pegawai-pegawai JLKN berstatus kontrak ini telah diperjelaskan status terkini kontrak masing-masing, status bayaran ganjaran dan usaha kerajaan dalam membantu pegawai-pegawai ini.

KBS, JPA dan MoF telah memberikan komitmen untuk membantu pegawai-pegawai ini dalam usaha mendapatkan pilihan-pilihan terbaik bagi meneruskan kehidupan. Sebagai contoh, KBS pada 30 November 2018 telah mewujudkan satu *profiling survey* di mana semua pegawai kontrak JLKN ini perlu mengisi *survey* berkenaan bagi dikenal pasti kecenderungan dan kelebihan setiap pegawai. Maklumat ini akan diberikan kepada agensi-agensi berkaitan

seperti SPA, JPA, MoF, Kementerian Pembangunan Usahawan dan JobsMalaysia untuk diberikan pilihan-pilihan pekerjaan ataupun kursus-kursus pembangunan sendiri.

Secara keseluruhannya, KBS akan sentiasa berusaha untuk membantu dan menjaga kebajikan pegawai-pegawai JLKN berstatus kontrak ini dan akan bekerjasama dengan kementerian-kementerian lain bagi mencari pilihan-pilihan terbaik untuk pegawai-pegawai ini.

Berhubung dengan peralatan-peralatan yang digunakan semasa program PLKN, KBS bersama pihak PLKN sedang dalam proses mengurus aset-aset alih PLKN bagi tujuan pemindahan dan juga pelupusan. Sebahagian aset-aset alih berkenaan akan digunakan bagi pelaksanaan program baru nanti. Terima kasih.

Timbalan Yang di-Pertua [Tuan Nga Kor Ming]: Terima kasih Yang Berhormat Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Rabu, 05 Disember 2018.

[Kamar Khas ditangguhkan pada pukul 2.48 petang]